

Opinion ta un seccion di **Bon Dia Aruba** specialmente pa brinda oportunidad na lectoran individual pa expone nan opinion. Contenido publica di ningun manera ta refleha opinion di **Bon Dia Aruba** y ta pa responsabilidad exclusivo di e organisacion/individuo cu ta ofrece esaki pa publicacion. **Bon Dia Aruba** ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di **Bon Dia Aruba**.

OPINION



Skirbi pa Gregorio Wolff

Hues a dicta su sentencia na favor di comision 11 di CAPA

E sentencia di 1 juli 2025 ta pa directiva di CAPA duna na comision 11, e registro di miembronan di CAPA. Di acuerdo cu statutonnan di CAPA, directiva a nenga di hacie y cual ta motibo pa comision 11 bay corte. CAPA ta un Cooperativa di miembronan di SEPPA.

CAPA tin + 1500 miembro y e miembro por spaar placa y ricibi un interes hopi biaha mas halto cu Banco Priva y ora di necesidad, e miembro por fia te cu 25 mil florin cu interes mas abao.

Un cooperativa ta un asosacion di hendenan, kendenan pa un o mas motibu ta lanta e asosacion pa coopera cu otro y busca bentahanan comun. E forma di coopera aki ta un organisacion habri pa miembronan por coopera cu otro, unda nomber, adres, telefoon y awendia e forman digital mester ta disponibel na tur miembro, pa coopera y comunica cu otro, ora ta nec-



esario. Pa e motibu ey CAPA tin e articulo 30 den statutonnan, unda e registro mester ta disponibel pa miembronan. Esaki Juez a mostra tambe.

Durante tratamento, Juez a bisa cu e no ta bay obliga directiva yama un reunion General pasobra den e statutonnan ya tin e opcion an-

cra con pa yama e reunion general, uzando e registro di miembronan y articulo di statutonnan nr 21, lid 4. Miembronan por yega na un cantidad di firma pa obliga directiva yama e reunion pa duna cuenta di e ladroncia di F 382.000,=. Si directiva no hacie e miembronan mes ta yama e reunion y tur desicion

ta legal.

Juez a mostra cu directiva di CAPA claramente a nenga di aplica statutonnan. Esaki ta un violacion di e constitucion di CAPA. Pa tur miembro sigur pa e lidernan, aplicacion di Statutonnan ta algo sagrado y violacion ta un delito pisa, cual ta motibo den e caso aki pa raya e directiva for di CAPA. Aserca e nengamento aki ta indica algo hopi fishy a sosode. Directiva kier tapa cos den e ladroncia aki di F 382.000,=, cual ta placa di miembronan di CAPA. No ta ladroncia di dosplaca, ni di un florin!!!

Preguntanan cu miembronan kier contesta Magaly Brito como Tesorero di CAPA, si e mesun Secretario General di SEPPA, e persona cu ta responsabel pa un bon maneho financiero den CAPA, den reunion general a bisa cu un banco local lo bay paga e F 382.000,=, pero comision 11 tin e veredicto di Juez, den cual Juez ta

bisa cu e banco no tin nada di haci cu e ladroncia. Berdad por ta, cu tin algun trahador di e banco cu ta amigo(a) di e sospechoso principal, pero e banco no ta involvi. CAPA a perde e caso mahos contra e Banco.

Ariba e pregunta di con ora a tuma e sospechoso principal den servicio no a haci un antecedenten-onderzoek na Ministerio Publico, manera ta normal ora un persona bin traha na un Instituto Financiero, Sra Brito a contesta cu esaki a "Escape"nan, esta como lider di un instituto financiero nan a lubida cual ta otro delito.

No tabatin debido informacion di e Tesorera den reunionnan general na 2023 y 2024. No Por Nos sa cu tabatin un investigacion di PG, tambe un Investigacion Forensico, tur sin cu Doñonan di placa=miembronan di CAPA por a wak, corda lesanan.

Skirbi pa Candelario A.S.D. Wever

Look Who's Talking: trose e berdad a para bira un arte

Cu gran asombro mi a scucha e politico papia di e consecuencia di un falta di maneho di desperdicio na Aruba. El a usa palabranan manera "denuncia" y "boycot" y aki a referi como culpabel e ex-minister di e gabinete Wever-Croes.

Na prome lugar ta obvio cu e gabinetenan encabesa pa sra. Wever-Croes no a hasi nada pa alivia e barionan pega cu dump di e holor desagradable di dump. Dicon?

Den diferente articulo mi a denuncia e "Omerta" (silencio absoluto) cu tabata existi bow di e partidonan cu tin representacion den parlamento. Parce cu papia di dump tabata y ta ainda un topico cu ningun partido kier a kima nan dede cu n'e. Pa-kico?

E contesta ta simpel. Durante cu ami tabata minister encarga cu Serlimar y desperdicio mi a logra un solucion cu segun tur experto tabata oportuno, esta Bouldin&Lawson. Kico a sosode? E minister encarga cu desperdicio di e gabinete Eman y henter ministerraad cu entre otro Otmar Oduber a disidi di "boicotea" e proyecto. Partido MEP a keda keto, pasobra nan kier a aleha nan mes di mi persona, cu segun nan tabata e motibo dicon a perde e eleccion.

Lamentabel di henter e caso aki ta cu e gabinetenan di sr. Eman nunca a dedica atencion pa crea un solucion permanente pa maneho di desperdicio. Otmar Oduber, despues di a retira for di AVP, a funda e partido POR cu a yega na un acuerdo di gobernacion cu partido MEP. El a

exigi encargo di entre otro maneho di desperdicio. Dicon? Pasobra aki tin placa, manera historia a demonstra.

Otmar a nombra un persona cu antecedente scur bira director di Serlimar. A huur un edificio na Pos Chikito di un otro amigo sponsor. A laga traha riba tur truck di Serlimar propaganda di personanan conoci den nos sociedad. A exige pa parlamento acepta extra budget pa Serlimar sigui "djodjo"! Esaki sin cu e compania lo a entrega nan cuentanan anual manera ley ta exige.

Riba dje a cumpra (corupcion) un incinerator, atrobe door di un amigo sponsor, cu no tabata adecua. Esaki despues cu a yega na un acuerdo cu e compania Johnson cu tabata encarga cu maneho di e "sludge" di RWZI. Tabata

conoci caba cu RWZI a yega na un punto cu inversionan grandi tabata necesario pa evita un desastre ambiental cu lo a perhudica nos turismo. Tabata tin un poco fondo y Otmar a disidi di enbes di drecha RWZI a usa e placa pa atrobe faborese un amigo sponsor.

Cero di Teisha tabata un plan di e mesun Otmar. Den diferente articulo mi a adverti cu e forma cu tabata dera e "bales" den tera no tabata adecuado y cu esaki lo bira otro dump. Kico a sosode? Omer-ta, pues nada atrobe. Tur partido politico cu boca cera y a permiti Otmar sigui hasi su fechorianan. Otmar a hasta tribi di usa rapport di PAHO cu tabata indica e daño ambiental y medico cu dump lo nifica pa e habitantenan di e bario di Parkietenbos, pero no pa alivia e bario sino pa

beneficio atrobe di amigonan sponsor.

Pues Otmar ta un di e autornan intelectual di e falta di maneho y hasta abuso di fondonan cu mester a wordo dedica na desperdicio. E tabata forma parti di e gobierno di Eman cu a boycott Bouldin&Lawson. El a usa fondonan pa otro actividad cu drecha RWZI, a crea un desastre cu creacion di cero di Teishi y a desbarata Serlimar for di otro.

Y kico e otro partidonan politico ta hasi? Manera di custumber nada pasobra nan sa cu nan ta co-culpabel di tur e desastre cu a tuma lugar y ta prefera atrobe omerta y laga Otmar hasi comosifuera e no a kibra un kopi.

Mientras tanto habitantenan di bario ta sufri.